

Inatsisissatut siunnersuummut nassuiaatit

Nalinginnaasumik nassuiaatit1. Aallaqqaasiutt:

Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaat nr. 22, 18. december 2003-meersoq (Aningaasarsiaqartitsinermut inatsit) akuersissutigineqarmat taamani Inatsisartunut ilaasortaasut § 3, imm. 4 naapertorlugu ilaasortamut ataatsimut ukiumoortumik aningaasatigut killiliussat iluanni Kalaallit Nunaanni paasisassarsiorlutik angalanissamut inatsisitigut pisinnaatitaalerput. Inatsisartut inatsisaata nr. 8, 1. juni 2006-imeersup akuersissutigineqarneratigut inunnut ataasiakkaanut inatsisitigut pisinnaatitaaffiit aalajangersakkallu tassunga tunngasut atorunnaarsinneqarput. Taamaaliornikkut ilaasortat angalanerisa piareersarneqarneranni ataqatigiissaarneqarnerannilu naalackersuinikkut suliniaqatigiiffiit ataasiakkaat annertunerusumik peqataatinneqarnissaat ammaakkumaneqarpoq, tamatumani tunngavissaatinneqarluni Inatsisartut Siulittaasoqarfiata inatsisitigut tunngavissaqartinneqarnani paasisassarsiorluni angalanernut aningaasanik immikkoortitsisarnerata ingerlatiinnarneqarnissaanik naatsorsuutiginnineq.

Naalackersuinikkut sulinermut aningaasatigut tapiissuteqartarneq pillugu Inatsisartut inatsisaat kingullermik Inatsisartut inatsisaatigut nr. 16, 3. december 2009-meersukkut allanngortinneqarpoq. Inatsisip kingullermik allanngortinneqarnerani inatsisitigut ersarissumik tunngavissaqartinneqanngippat Namminersorlutik Oqartussat partiinut, kattusseqatigiinnut kisimiillutilluunniit qinigaasunut toqqaannartumik toqqaannanngikkaluamilluunniit aningaasatigut tapiissuteqarsinnaanngitsut immikkut aalajangersarneqarpoq. Inatsisartut inatsisitigut tunngavissaqartinneqarnatik partiit paasisassarsiorlutik angalaneranut aningaasanik immikkoortitsisarnermik ingerlatsiinnarnerat tapiissuteqartarnermut inatsisip allanngortinneqarneranut naapertuutinnigilaq, taamaattumillu 2011-mit aallartittumik Inatsisartut missingersuutaannit siunertamut tamatumunnga aningaasanik immikkoortitsisoqartarunnaassalluni.

Taamaakkaluartoq Inatsisartunut ilaasortat qinersisartunik attaveqarnerminnik attassiinnarnissaat aammalu inuiaqatigiinni ineriartorneq pillugu ilisimasanik nutaanik pissarsiuannarnissaat siunertaralugit paasisassarsiorluni angalanernut aningaasaqarnikkut periarfissaqaannarnissaasa qulakkeerneqarnissaa pisariaqartutut isigineqarpoq. Taamaattumik naalackersuinikkut sulinermut aningaasatigut tapiissutit 1. januar 2011 atuutilersumik amerlineqarnissaat siunnersuutigineqarpoq. Partiit namminneq naliliinertik malillugu paasisassarsiorluni angalanernut imaluunniit naalackersuinikkut sulianut allanut aningaasat

taakku amerlissutaasut atorsinnaassavaat. Inatsisartunut aningaasaliissutit taakku amerlaqataannik ikilinerisigut siunnersuut aningaasalersorneqassaaq.

Allannguutissatut siunnersuut Inatsisartut allaffissornerannut partiinullu iluaqutaassasoq nalilerneqarpoq. Taamaalilluni Inatsisartunut ilaasortat partiinilu atorfillit paasisassarsiorlutik angalanerannut atatillugu suliaasat isumagineqarnissaannut Inatsisartut Allattoqarfiat allaffissornikkut nukissanik siunissami atuiffiussangilaq. Tamatuma saniatigut partiit aningaasaqarnikkut suliatigullu pituttorsimanginnissaat siunnersuutikkut isiginiarneqarpoq.

Inatsisartut ataatsimiititaliaasa ataavartut ataatsimiititaliallu inatsisit malillugit pilersinneqartussaataasut kiisalu siulittaasoqarfiup paasisassarsiorlutik angalasarnerinut periarfissat tunngavissarititaasullu atuuttut siunnersuutikkut allanngortinneqassanngillat.

2. Namminersorlutik Oqartussanut aningaasatigut allaffissornikkullu kingunerisassat:

2.1 Aningaasatigut kingunerisassat

Inatsisissatut siunnersuut akuersissutigineqassappat, kontumit pingaarnermit 01.10.10-mit, Inatsisartunut tunngasumit, missingersuutitut aningaasaliissutinit kr. **1.240.000**-it kontumut pingaarnermut 01.06.11-imut, Naalackersuinnikkut suliniaqatigiiffinnut aningaasatigut tapiissuteqartarnermut tunngasumut, nuunneqartussaassapput. Tamanna 2011-mi aningaasanut inatsisissatut siunnersuummut allannguutissatut siunnersuummik saqqummiussinikkut pissaaq.

Inatsisartunut ilaasortat partiillu allaffeqarfiinit angalaqataasut paasisassarsiorlutik angalanerinut, ullormusianut il.il. aningaasartuutit ukiuni kingullerni tallimani agguaqatigiissillugit ukiumut 775.000 kr.-it missaanniissimapput. Siunnersuutigineqartutut partiinut tapiissutit amerlineqarpata taamaalilluni naalackersuinnermik suliaqarnermut tapiissutit piviusumik ukiumut 465.000 kr.-inik amerlineqassapput ukiuni siuliini agguaqatigiissitsilluni atorneqartarsimasunut sanilliullugu. Tamanna Inatsisartut Siulittaasoqarfiata naalackersuinnikkullu suliniaqatigiiffiit akornanni naapeqatigiinnermut ersersitsineruvoq. Aningaasat siunnersuutikkut partiinut nuunneqartussat amerlassusissaasa assigiinngitsunik isumaqarfigineqarnera taamaalilluni Siulittaasoqarfiup isiginiarsimavaa.

2009-mut Nunatta Karsiata naatsorsuutai malillugit kontumi pingaarnermi 01.10.10-mi Inatsisartut 270.000 kr.-inik atuisukinnerusimavoq. Ukiuni siuliini ukiumut 400.000 kr.-it missaannik atuinikinnerusoqartarsimavoq. Inatsisissatut siunnersuut akuersissutigineqassappat kontumut pingaarnermut 01.10.10-mut Inatsisartut amerlanerusunik aningaasaliissuteqarnissaq pisariaqartilersinnaavaa, tamanna 2011-imut aningaasanut inatsisissatut siunnersuutip akuersissutigineqarnissaata tungaanut isumaliutigineqarumaarpoq.

2.2 Allaffissornikkut kingunerisassat

Inatsisissatut siunnersuut Inatsisartut allaffissornerannut annikinnerusumik oqilisaataassaaq, partiit sinnerlugit aningaasanik aqutsineq tassannga isumagineqarunnaassammat. Taamaalilluni Inatsisartut allaffeqarfiat ilaatigut angalanissamut siumoorutinit ullormusianullu atatillugu naatsorsuusiortassanngilaq, tassami angalanissamut siumoorutinit, ullormusianut paasisassarsiorlunilu angalanermut atatillugu tunniuttakkanut allanut kiisalu taaku naatsorsorneqartarnerinit akisussaaffik tamarmiisoq inatsisissatut siunnersuutip kingunerisaanik partiit namminneq allaffeqarfiinit isumagineqartussanngorlugu nuunneqassammat.

3. Inuussutissarsiornermut aningaasatigut allaffissornikkullu kingunerisassat:

Siunnersuut inuussutissarsiornermut kinguneqassanngilaq.

4. Avatangiisinut pinngortitamullu kingunerisassat:

Siunnersuut avatangiisinut pinngortitamullu kinguneqassanngilaq.

5. Innuttaasunut allaffissornikkut kingunerisassat:

Siunnersuut innuttaasunut kinguneqassanngilaq.

6. Kingunerisassat annertuut allat:

Siunnersuut annertuunik allanik kinguneqassanngilaq.

7. Naalagaaffeqatigiit Namminersorlutillu Oqartussat akornanni pissutsit:

Siunnersuut Naalagaaffeqatigiinnut Namminersorlutillu Oqartussanut kinguneqassanngilaq.

8. Oqartussanik suliniaqatigiiffinnillu tusarniaaneq:

Siunnersuut innuttaasunut inuussutissarsiornermullu kinguneqartussaannngimmat tamanut ammasumik tusarniaassutigineqanngilaq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut.

Aalajangersakkakut partiinut, kattusseqatigiinnut kisimiillutillu qinigaasunut ataasiakkaanut tapiissutit 40.000 kr.-inik amerlineqarput. Qaffaaneq pivoq Inatsisartunut ilaasortat partiinilu suleqataasut angalaqataasut paasisassarsiorlutik angalanerinit atatillugu aningaasartuutinit suugaluartunulluunniit partiit siunissami tamakkiisumik akisussaaffeqalernissaata malitsigisaanik.

§ 2-mut

Nr. 2-mut.

Inatsisip 1. januar 2011-mi atuutilernissaa siunnersuutigineqarpoq, tassa ukiup aningaasanut inatsiseqarfiusup aggersup aallartinnerani.